

Geodatastyrelse pillugu Inatsisip atuutilersinneqarnissanik Kunngip peqqussutaa, Inatsit nr. 1392 23/12/2012-imeersoq (Danmarkip maanna siunissamilu Kalaallit Nunaata nunataa pillugu tunngaviusunik paasissutissaataasa ammaanneqarnerat) **inatsisip atuutsinneqalernissaanut Inatsisartut aalajangiiffigisassaannut siunnersuut**

(Aningaasaqarnermut Aatsitassanullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit siunnersuut Geodatastyrelse pillugu Inatsit Kunngip peqqussutaa saqqummiutissavara.

Danmarkip maannakkut siunissamilu Kalaallit Nunaannut tunngaviusumik paasissutissanik paarisaanik killilersorneqarani pissarsiaqarsinnaangornissaq Kunngip peqqussutaanik siunnersuummik suliaqarnerup aallaavigaa.

Paasissutissat tunngaviusut ammaanneqarnerannut paasissutissat kikkunnit tamanit pissarsiarineqarsinnaangornissaat, taamalu inunnt suliffeqarfinnullu akeqanngitsumik siammarterneqartarnissaat siunnersuummi anguniagaavoq. Nunanit allanit misilittakkat erseqqissumik takutippaat tunngaviusumik paasissutissat ajornannginnerusumik pissarsiarineqarsinnaanerat inuiaqatigiinnut malunnaatilimmik iluaqutaanerulersartut aamma ineriartornissamut periarfissat nutaat pilersinneqartartut. Aamma paasissutissanik tunngaviusunik atuisinnaatitaanerup ammaanneqarneratigut sullissisarnerup pisariinnerulersinneqarnissaa siunertaavoq. Taamaalilluni kikkut tamarmik Geodatastyrelsimit akuersissummik pissarsiniaqqaaratik paasissutissanik takunnissinnaalerlutillu atuisinnaalissapput.

Naalakkersuisut, Kalaallit Nunaanni paasissutissanik tunngaviusunik ingerlateqqiinermit siursaaniarlutik ilungersuutaannut ilaasutut siunnersuut isigineqassaaq.

Taamatut oqaaseqarlunga siunnersuut Inatsisartunut suliassanngortippara, aappassaaneerneqannginneranilu ataatsimiititaliamut innersuunneqaqqullugu.